



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :

f Tir Yimyim


Instagram tiryimyim@aolima

YouTube tir yimyim

TAPAK 8

Bolsonaro pusemertemi Brazil nung sorkar office tongtibangtem amak

South Africa nunger asayar Pretorius asaya nungi anener



VOL. XX NO. 88 (ADOK 88) DIMAPUR

SANGTENNÜ (TUESDAY)

ANEJETI (JANUARY) 10, 2023

₹ 5.00

## SC-i UCC atema luden tentetba anema PIL magizük

New Delhi, January 9, 2023

(Agencies): Gujarat aser Uttarakhand sorkartemi Uniform Civil Code (UCC) tenzüksü atema luden tentetba anema public interest litigation (PIL) benokba Supreme Court-i magizük.

Chief Justice of India DY Chandrachud aser P S Narasimha na adenba bench-i ashiba agi "iba lemtet anema ken o benoktsü makok kechiyong Constitution nung Arrla 162

ajanga state nem tashi agüja lir." "Arrla 162 nung administrative powers agüja aliba ama parnoki luden tentet" ta CJI Chandrachud-i ashi.

Gujarat state cabinet-i state nung UCC tenzüksü atema luden ka tentetba lemtetogo ta Home Minister Harsh Sanghavi-i October 29, 2022 nü ashi.

Külen, Uttarakhand sorkaria UCC tenzüksü atema mongintem adenba luden ka tentetogo.

## NTC-i NSCN/GPRN (K) dang angatetteptsü ayongzük

Dimapur, January 9, 2023

(TYO): January 4, 2023 nungi tenzük NTC-i NSCN/GPRN (K) sasep nung mepetmesü adoka aruba osang angashia kanga aoksar ta Nagaland Tribes Council (NTC)-i sangdong ka nung ashi.

Iba ken o ya parnok tsüingda bentettsüba dak alaka tangari kecha meinyaktettsü anungji Yisu Khrista tenüng nung angatetteptsü imlar, ta NTC-i ashi.

"October 31, 2019 nü India sorkar den olemtep tembangba nung ajemdaker aser General

Election 2023 matongdang NPGs-i Naga yimten latettsü ashir. Tanüingba Naga nungeria yimten latettsü kanga dang yongyaseta atar. Anungji iba ama tensa ka nung asenok ajaki inyaktetba nung timtem madoktsü atema mapang tajung akhümsübuttsü" ta Media Cell, NTC sangdong nung shia lir.

Telok anatsülen nungi putepshitsüba indang osang agütsüoggo anungji lennirtemi Kolosi 3:13 aser Mathi 5:24 nung ajemdaker putepshitsü mepishir, ta NTC-isa ashi.

## NLA General Election atema SSCAE senden amen

Dimapur, January 9, 2023

(TYO): January 9, 2023 nü State Steering Committee on Accessible Election (SSCAE) senden ka menogo.

Iba senden nung Chief Electoral Officer Nagaland, V. Shashank Shekhar, IAS-ia anir ketdangsürtem aden aser parnoki Nagaland Legislative Assembly, 2023 indang General Election atema onüktem lemsatop.

Senden nung PwD Mapping aser voters enrolment, ramps/wheelchairs/volunteers for PwDs & Senior citizens, free transportation aser Polling Station Infrastructures onüktem lemsatop.

Parnokisa Accessible Observers shimtsü, IT Infrastructure and Accessible Communication, CSOs/NGOs den yaritepa PwDs o Senior citizens yaritsü training agitsü, Home Voting facilities aser

PwDs o senior Citizens atema helpline facilities indang jembi.

Tanü senden nung adenba SSCAE züngsemtemji Dr. E.Motsuthung Patton, Addl. Director, Health & Family Welfare Department, Smt Diethono Nakhro, State Commissioner for PwDs, Dr. Nitovi Shikhu, Deputy Director, Health & Family Welfare Department, Smt Temsunaro Aier, Mission Director, Samagra Shiksha, School Education Department, Dr. Chumbeni Kikon, Joint Mission Director, Samagra Shiksha, School Education Department, Lanusenla Lemtur, Coordinator, Samagra Shiksha, Shri Tongpang L Jamir, Nagaland Parents Association for Disabled aser Smt. Venedulu Vero, Research Officer, Social Welfare Department nunger liasü.

## Manipur driver temi lungkak ait

Imphal, January 9, 2023

(Agencies): Manipur nung Imphal-Moreh road nung passenger anir senzüba driver temi January 9, 2023 nü mapa meinyaki lungkak aitogo.

Manipur nunger passenger driver Yanglem Priyobrata ka tepsetba atema tejashi nung parnoki lungkak ait. Priyobrata indang tasüming ya Honibarnü Nagaland nung angu.

"Priyobrata ya Bishnupur district kübok Nachou Awang Leikai nunger liasü aser Heisnam

James ta ser nisung kati December 30, 2022 nü Dimapur-i aotsü ta ser anir ao. Ajisüaka, January 7, 2023 nü Kisama, Nagaland nung Priyobrata mang angu" ta All Imphal-Moreh Drivers Union züngsem kati ashi.

Onoki iba tatalokba khukhua aitsür aser Priyobrata tepseter nem tasüba temerenshi agütsütsü akhanger, ta All Imphal-Moreh Drivers Union-i metetdaksü.

Külen, police-ia Heisnam James ta ser nisung ka pua lir.

## Langpangkong Kaketshir Mungdang Küm 75 jubilee amunger



Chuchuyimlang yimdak January 9 aonung Langpangkong Kaketshir Mungdang Küm 75 Bensa Washimung aser 33 Buba Saisapong tenzükba sentong nung Choir-i ken atendang agiba noksa angur.

Chuchuyimlang, January 9, 2023 (TYO): Lanurtemi college aser university nungi tangazükba jenti ngua metetaka pei tetsü oshi aser pei sobaliba memetera tazüingla taküm ka akümsü ta MLA Amenba Yaden-i ashi.

Chuchuyimlang yimdak January 9 aonung Langpangkong Kaketshir Mungdang küm 75 Bensa Washimung aser 33 Buba Saisapong tenzükba sentong nung Sentong Akhümdong ka ama jembidang MLA Amenba-i iba ya ashi.

Paisa pei sobaliba aser pei tetsü oshiji senti rongsen ama agitsüla, alima ainba leni atsür aodang asen sobaliba tajungji mesendoktsüla ta mungdangsanger ajungshia ashi.

Alima tapu aika ajangdanga arur Langpangkong Kaketshir Mungdang (LKM) küm 75 abensaa arudang LKM-ji tziukong asoshi dang masü saka nürburtem asoshi terangrang lensar ka ama lia aruogo, ta Amenba Yaden-isa ashi.

Item taoba mapangtem nung takok angubatemi jembi mekazüi tanü alima ainba den

tsüingka medema otettsü asoshi bilemstüla, inyakttsüla aser alitsüla ta paisa shisem.

Jubileemung sentong den külemi anogo asemnü tashi saisapong sentong akaba mapang nungji takok angutsü merangba mapang nung yimjung kadakja asayang Amenba-i saisapongertem ayongzük.

Naga nunger yimden ken o telemtetba kati marutetba ajanga Naga lima rajang akümer, ta paisa metetdaksü.

Naga nunger Yimden ken o jembiba tatembang kati marutetba ajanga election otsü mejembii dang aru, saka telemtetba kecha magii dang aruba mapang ka nung election agitsü mapang tonga aruogo ta Amenba-isa shisem.

Naga nunger adianu kar telungjemi parnok balaka pakzuka odi asür ibaji ajanga Naga nunger tashi meiti aotsüta sasa bilemer ta pai ashi.

Iba sentong nung Dr. Wt. Sentitula Pongen, IFS, Divisional Forest Officer Mokokchung-i "Terangrang Lensar" onük jembi. Sentong nungsa Tsüngrem

lenisüba jazüka Chuchu Town Baptist Arogo Pastor Rev. Temjenlemzüng-i sarasadem, LKM Tatong Tir Tiakumzük Pongen ajanga Tarur Metepela agi, Riongsanger Putu Menden Chuchuyimlang Awola Sanen Pongen-i tarur pela-a agizük, Jangpetkong Kaketshir Telungjem Mungdang Tir Alemsashi, Tsürangkong Kaketshir Mungdang Tir Imlisünep aser Japukong Kaketshir Mungdang Tir Watinungsang par aseme salem o jembi.

Sentong nungsa Langpangkong Watsü Telungjem Tir Y. Anungla Lemtur, Langpangkong Senso Telongjem Dimapur Tir C. Yabang Pongen tenati tajungshi o jembi.

Iba den Secretary LKM Planning Committee Limawati Jamir-i achayanga LKM nung küm 50 sülen tenzuka arurtem nem certificate agitsü, Chuchuyimlang Kaketshir Telungjemi sentong lapok aser Kr. Aosenla I. Jamir o Jubilee Choir nunger ken ajanga shilem agia liasü.

## Thailand aser Nagaland tsürtem teküp ayokba nungi kümzük

Pune, January 9, 2023

(Agencies): Tawa tu Pune kübok Kondhwa area nung Pune city police-i spa tenüng amer teküp ayokba maparen ka putetogo aser idangji Thai tsür 3 aser Nagaland nungi tetsür ka kümzük.

Pune police-i spa indang manager puogo aser kiburtem aputsü atema bushitepdar.

Pune city police indang social security cell telok kati spa ka nungi teküp ayokba maparen inyakba osang angashia

bushisüingdanga aru. Iba osang jangjaba sülen parnoki Honibarnü spa mita ao.

Police-i Immoral Traffic (Prevention) Act aser Indian Penal Code kübok onük balala nung ken o ka benokogo.

## EC-i Tripura, Meghalaya & Nagaland semdangtsü

New Delhi, January 9, 2023

(Agencies): Tripura, Meghalaya aser Nagaland nung assembly elections agitsü aliba atema Election Commission-i tan hopta semdangtsü.

Chief Election Commissioner Rajiv Kumar aser Election Commissioner tem- Anup Chandra Pandey aser Arun Goel nungeri January 11 nungi tenzük state asem semdangtsü ta ketdangsürtemi ashi.

Taküm February-March nung northeast state asem nung assembly elections agitsü akok.

Tripura nung BJP sorkar lir, Nagaland nung Nationalist Democratic Progressive Party (NDPP) aser Meghalaya nung National People's Party ajanga sorkar küma lir.

Külen, election agitsü aliba state aseme Central Armed Police Forces (CAPF) arutsü tenzükogo.

Meghalaya-i assembly

elections atema CAPF indang company 119 meshiogo aser tang tashi nung central forces company 30 aruogo ta state election commission ketdangsür kati ashi.

Nagaland-ia CAPF aika arua mapa lemzüksüoggo.

CAPF indang company 50 tashi Tripura-i aruogo aser ano company 50 talila arutsü, ta Tripura Chief Electoral Officer Gitte Kirankumar Dinkarrao-ia ashi.

### NCC camp nung Chubamayang-i shooting tetoktepba akok



**Dimapur, Aenjeti/January 9 (TYO):** Fazl Ali College, Mokokchung nungi Sergeant Chubamayang-i, 0.22" Rifle Shooting Competition Senior Division Category nung temaba jenjang ajangzüketetogo.

Pai 2cm grouping score aser pa sülen St Xavier College, Jalukie nungi runner-up Lance Corporal Gaijenbung-i 3cm grouping score süa liasü. Iba tetoktepba ya NCC Combined Annual Training Camp (CATC) nung shilem ka liasü, koba 25 Naga Bn NCC-i ayongzükä January 5 nungi 23 tashi amungtsü.

Iba camp nung Nagaland kübok district 11 nungi NCC cadet tem nem firing, handling,

aser small arms maintenance aser talisa 0.22" calibre Sporting Rifles dak sendakba nung training agütsüdar. Cadets tem nem injang mekadaktsü tsüingda Squad Post training aser dry practice tem ayongzükä tangazükba agüja liasü.

Iba shooting sentong ya 25 Naga Bn NCC, Mokokchung tawabangka kübok CRPF Small Arms Range, Mokokchung nung anogo ana tashi agia liasü.

Osangbenertem den sensaksemba mapang Camp Commandant aser 25 Naga Bn NCC, Commanding Officer Col CST Swamy-i, shooting ya NCC training nung ajak dang tongtibangba lir aser shooter tajungtibatem nem National

Level NCC Shooting Competitions nung Nagaland tenung nungi tokteptsü atema maongka agütsütsü, ta ashi.

Paisa, Naga nungertem ya shikaritem lir aser azü nungi ket aruba iba sempet ya NCC training nung tajungba küma arantetshitettsü aser cadets tem dak National aser International jenjang nung shooting tetoktepba nung temaba jenjang tonga tokteptsü atema sempet lir, ta ashi.

Paisa, iba tetoktepba atema shooting range amshitsü temelaba agütsüba asoshi Asst Comdt Anal Togain, OC, CRPF Coy, DEF Camp, Mokokchung dang kanga pelaba lemsatöp.

### KÜM 75 ABENSABA TEPELA ANOGO



**OBALA LANUTOSHI LONGKUMER (CHUNGTIAYIMSEM)**  
Obala nem arishi talang moatsüba asoshi Tsüngrem nem tenüsang agütsür aser ano maneni obala nem arishi küm aika moajangni ta iba anogo tulu nung ner chirnur aser adianutem onok ajak sarasadema amonger.  
*-Temeim Kinungtsü, Chirnur aser Semchisemnurtem.*

### CANSSEA-i asükhu lemsatöp

**Dimapur, Aenjeti/January 9 (TYO):** Confederation of All Nagaland State Services Employee's Association-i sangdong ka ajanga MLA aser taiba Nagaland Legislative Assembly Speaker Dr. Imtiwapang Aier ajungbena asüba osang angazükä mang ayimba lemsatöpogo.

Pa asüba ya takoksa tulu ka, shiba lanur ka dang aser tedangshi lenir ka liasü aser pai

Naga nunger asoshi ano mapa tajung aika inyaktetsü liasü.

CANSSEA-i asür kinungertem den asükhu lemsateper aser mangyim jashi nung aliba mapang Tsüngremi parnok nem anisüngzük agüjang ta sarasademtsür. Asür tanüla teti tatem makadak anisüngzükdakjang, ta CANSSEA tir Dr. Ilang-i sangdong ka ajanga lemsatöp.

### Phek nung Sükrünye benjung amungtsü

**Dimapur, Aenjeti/January 9 (TYO):** Phek Town Youth Society aser Nehru Yuva Kendra Phek na longjemer Chakeshang nungertem atema Sükrünye benjung den repsema Youth Festival amungtsü atema sentong yanglua aliba metetdaktsüogo.

Iba benjung ya "Fairing the flair" omen nung ajemdaker

January 14 aser 15 nü Phek jila local ground nung amungtsü.

Benjung lapokba sentong nung MLA aser NPF Legislature Party lenir & Co-Chairman UDA, Kuzholuzo Azo Nienu alakteta jaoker asütsü aser Deputy Commissioner Phek, Kumar Ramnikant, IAS Sükrünye benjung atema mejeta jaoker asütsü.

### Kohima nung Nodal Officers tem senden amen

**Dimapur, Aenjeti/January 9 (TYO):** 2023 küm State Assembly Election agitsü aliba dak sendakba nung Election Cells balala nungi Nodal Officers tem ajak senden ka January 9 nü DC Conference Hall, Kohima nung menogo.

Nodal Officers tem den sensaksemba mapang Deputy Commissioner & District Election

Officer Kohima, Shanavas C, IAS-i, Election Cell balala nung Nodal Officer tem indang shilem aser khurettem metetdaktsü. Paisa, parnok ajak tekelok shisatsü renema alitsü ayongzükba den election agitsüba mesangdong tsüingda pei team tem tentetter atatsü ashi.

Maneni DC-i, election inyakyim kübok section

tongtibangtem dak rangloker jemi aser parnok dang election inyakyim kecha tetsükdaktsü makai inyakyonga aotsü atema pei team tem den maparen inyak tenzüktsü ajungshi.

Iba senden nung manpower, training, material aser transport aser election cell balala achayangtsü atema tatongi sensaksemba liasü.

### Peren District Planning & Development Board senden menogo



Peren District Planning & Development Board senden amendang tangokba noka angur.

**Dimapur, Aenjeti/January 9 (TYO):** Ita shia amenba Peren District Planning & Development Board senden January ita atema DC's Conference Hall, Peren nung January 9 nü menogo. Iba senden ya DC & Vice Chairman, DPDB Peren, Vineet Kumar, IAS lenisüba nung mena liasü.

CMHIS enrollment onük lepa reprangshiba mapang DC-i, itasen ajemshir agütsü tenzükter asünung pai department shirnoki enrollment inyakyim tembanga inyaka mali parnok dang takaratiba nung

inyaktsü mepeshia metetdaktsü. Election atema renemshiba dak sendakba nung Kumar-i, Department tekolak ajak aser Nodal Officer tem dang employee ajak training nung shilem agidaktsütsü atema jenjang tapet agitsü metetdaktsü koba yakta tenzüktsü ta pai ashi.

Paisa, 2012-2013 nung nisung aika mapa nungi anenba ajanga district nung employee tem agi anünger, anungji kuli kanga tejangja mesüra election duty nungi shinga nema soti magütsütsü ta ashi. Maneni pai züngsemtem dang political

party balala pu mesemi teyongtsü nung alitsü ajungshi. Kasa mapang nung DC-i, SDO (C) Hq, Kelevituo Nisa nem taruba Republic Day atema department ajak den tongtepratepa sentong yanglutsü nongloktsü.

Senden amenba sülen EAC Peren, Seyievilie Pfkri aser Addl. SP Peren, R.T. Chang nati züngsemtem dang EVMS aser wireless set amshiyim sayua liasü. Iba sülen ano mapang tatsüka lir Election atema renemshitsü asoshi Deputy Commissioner lenisüba nung senden ka mena liasü.

### Moanaro Imchen-i züluba Tanelaren Lenitsü Ajok kaket sayaogo



Moanaro Imchen-i(tiyong) züluba "Tanelaren Lenitsü Ajok" ta asüba kaket sayar kelen Kumlong Baptist Arogo Pastor Kikum Longkumer(tachichi) aser Ao Senden Literature Board Secretary Wb.I.Temjen Tzüdir nunger külemi tangokba noksa angur.

**Mokokchung, Aenjeti/January 09(TYO) :** Moanaro Imchen-i züluba "Tanelaren Lenitsü Ajok" ta asüba kaket tanu Kumlong Baptist Arogo Pastor Kikum Longkumer-i meshiteta sarasademtsür sayatsüogo.

Iba kaket sayaba sentong nung Ao Senden Literature Board Secretary Wb.I.Temjen Tzüdir-i kaket nung aliba teratet adenshia alibapurtem den lemsatöp. Iba den kaket zülur-i lai kaket züluba mapang nung Tsüngremi len aniba aser

yarieper ajak deng pelaba metetdakja jemi.

Iba sentong Kumlong Baptist Arogo Asso.Pastor(W) Rachel Jamir-i ketsüa agiba den sentong nung Tsüngrem leniba meshia Jonglemdong Deacon-i sarasadem aser tatem nung Baptist Arogo Asso.Pastor F/MAsso.Pastor Dr.R.Zülü Jamir-i sarasadema tembanga liasü.

Iba kaket ya jenjang senpak 300 aser Dimapur nung Heritage Publishing House aser Mokokchung nung Connect nung angutsü.



January 09, 2022 nü Indore nung 17buba Pravasi Bharatiya Divas sentong nung Ato kilonser, Narendra Modi, Guyana Tir, Mohamed Irfaan Ali, Suriname Tir, Chandrikapersad Santokhi, Madhya Pradesh Angh Mangubhai C. Patel aser Madhya Pradesh Chief Minister Shivraj Singh Chouhan nung adenba noksa nung angur. Iba sentong nung adentsü atema linük 70 nungi India nung 3,500-i tenng agütsü.

**Yaküm India nung tetsürtemi kinüngburi azükba ken o 6,900 benok**

**New Delhi, January 09 (Agencies):** 2022 küm India nung kidang kinüngburtemi kinüngtsür dak azükba atema kinüngtsürtemi ken o benokba 6,900 dak tema liasü; item ken oji 'protection of women against domestic violence' category nung lir.

Iba ya National Commission for Women (NCW) atema tebilemtsü onük tuluka lir. 2022 küm tetsürtem anema inyakba ken o balala 30,900 dak tema liasü aser iba nungjagi kinüngburtemi kinüngtsür dak azükba ken oji shilem 23 (ken o 6,900) lir.

Coronavirus wara aliba mapang nunga tetsürtem anema inyakba ken o teimba aküm; 2020 küm tetsürtem anema inyakba ken o 23,700 aliba nungi 2021 küm nungbo shilem 30 agi teimba kuma ken o 30,800 dak tema liasü.

Coronavirus wara süngjemba küm, 2022 nunga item ama ken o ano teimba kuma tetsürtem anema inyakba ken 30,900 dak tema liasü.

2020 küm tetsürtem anema inyakba ken otemji category asem liasü - taküm akhümketa alitsü temeden (shilem 31); kinüngburtemi azükba nungi kümzüka alitsü (shilem 23) aser dowry atema tetsürtem amokmerenba (shilem 15) lir.

State tem sasep nung ken o teimbaji Uttar Pradesh nung (shilem 55) liasü; iba sülen Delhi (shilem 10) aser Maharashtra (shilem 5) na lir. 2021 küm nunga tetsürtem anema inyakba ken o teimtibatemji kasa state asem nungjagi liasü.

Tesüiba küm ishika tsüngda küm shia tetsürtem anema inyakba ken o teimba-teimba dang akümba dak sendakba

nung NCW chairperson, Rekha Sharma-i, iba ya Commission ajanga "jan sunwais" (yimjak nung ken o angadamba), mapang telatet yur ken o bentetba, complaints cell teimba akümba aser 2021 küm July ita nung 24x7 helpline platform (7827170170) tenzüka kulitem ajanga lir; item mera agia inyakba ajanga tetsürtemi tasü ita kinüngburtemi parnok dak azükba anema ken o benoker aser teyari meshir, ta metetdaksü.

"Onoki mapang shia social media densema onok sabang ajanga tetsürtem dang pei tebilemtsü onük lemsateptsü ajungshir," ta laisa metetdaksü.

"NCW-i awareness programmes ayongzüka agir, ajisüaka linük tesem ajaklen stakeholders-ia awareness agütsütsü nungdak," ta laisa shisem.

**Joshimath nung terenlok project ajak anena atatsüla: Congress**

**New Delhi, January 09 (Agencies):** Hombarnü Congress-i, Uttarakhand kübok Joshimath nung ali anenoka aiba ya linük lendong ka, ta sangdongtsüla aser mongintemi ali anenoka aiba kuli bushia report magütsü tashi yangji terenlok projects ajak anena atatsüla, ta metetdaksü.

Opposition party-i, iba ya nisungi sayangtetba lendong ka lir, ta shia takoksa anguba kibong shia nem senotsü teyari agüjang, ta takhangba agütsü.

Congress-isa sorkar dang Joshimath jila tejenba ya wazüka ayutsüla aser jila nung alirtem jenokdaksütsü atema jila tasen ka tentetsüla, ta takhangba agütsü.

Congress Tir, Mallikarjun Kharge-i, "Alima kümzüka ayutsüla. Linük nübur ajak

shisabulur aser Joshimath nung nüburtemnungiter," ta metetdaksü.

Mallikarjun Kharge-i Hindi oshi nung twitter ajanga, "Onoki Modi sorkar nem takhangba asem agütsür - Joshimath nung tatalokba ya linük lendong ka, ta sangdongtsüla. Mongintem, scientist tem, environmentalists aser yangji alirtem ajak züngoka high level committee ka tenteta parnoki report magütsü tashi railways aser hydel power project densema project ajak anena atatsüla," ta metetdaksü.

"Joshimath nungi aishia alirtem nem sen 5000 ji masü saka PM CARES fund nungi senotsü teyari peria agütsütsüla," ta Kharge-i ashi.

Osangbenertem senden nung jembidang Congress party otongdar, Pawan Khara-i, mongintemi tetuyuba magütsü

tashi Joshimath nung terenlok mapa ajak anena atatsüla, ta ashi.

"Joshimath nung atalokba ya linük lendong ka, ta sorkari sangdongtsüla, kechiyong state sorkar kijai iba tena mazuokteter," ta pai metetdaksü.

"Iba ya nisungi sayangtetba lendong lir, aser iba ya NTPC indang tunnel atuba ajanga lir, anungji iba tunnel ji shibangtsüla," ta pai ashi.

Uttarakhand nung Congress in-charge, Devendra Yadav-i, "Congress nungi telok kati chief minister ajurutsü aser Angh nem temepishiba ka agütsütsü," ta metetdaksü.

Taoba mapang state chief minister, Harish Rawat-ia takoksa angur shia nem senotsü teyari sen 50,000 agütsütsüla aser Joshimath jila tasen ka tentetsüla, ta ashi.

**5 Buba Supongmeren Memorial Volleyball Trophy**

Venue : Molungkimong, Dist., Mokokchung  
Date: 17th - 18th January, 2023  
Mapang: 9:00 AM

Prizes : Champion - Rs. 70,000/- with trophy and certificate.  
Runner Up - Rs. 50,000/- with trophy and certificate.  
3rd Place - Rs. 30,000/- with certificate.  
4th place - Rs. 10,000/-.

Individual Prizes : Best Spiker - Rs. 3000/-, Best Setter - Rs. 3000/-  
Best Discipline Team etc.

Entry Fee Rs. 3000 per team.  
Last date for submission of forms : 14th January 2023.

Sd/- Sd/-  
P. Imti Aier (Convenor) Maki Ozukum (Secretary)  
(9383014469) (7005700719)

**Küm asem tsüngda CAPF sepai 177 süogo: Centre**

**New Delhi, Aenjeti/January 9 (Agencies):** Tesüiba küm asem tsüngda duty nung aliba mapang Central Armed Police Forces (CAPFs) sepai 177 taküm tenla agüja süogo, ta Union Minister of State for Home, Nityanand Rai-i metetdaksü.

Rajya Sabha senden nung Rai-i, 2019, 2020 aser 2021 kümtem nung sepai teimba (98) asübaji CRPF sepaitem liasü aser kasa kümtem nung BSF sepai 40 asü.

Tasüngdangba ka langzudang minister-i, küm

alidang ITBP sepai 19 asü, Assam Rifles 13, CISF sepai pezü aser SSB sepai aseme taküm tenla agüja süogo, ta metetdaksü.

Minister-isa, 2022 kümtenla agüja asür sepai kibongtem nem senotsü teyari sen lakh 25 nungi lakh 45 tashi agütsüogo; family pension agütsü, retirement gratuity, leave encashment, central government employees group insurance scheme aser general provident fund agütsüogo, ta metetdaksü.



January 09, 2023 nü Kolkata nung West Bengal Chief Minister, Mamata Banerjee-i G20 indang mezüngbuba 'Global Partnership for Financial Inclusion' senden nung jembidang tangokba noksa nung angur.

**PM Modi-i Suriname Tir aser Guyana Tir na den senden amen**

**New Delhi, January 09 (Agencies):** Hombarnü Ato kilonser, Narendra Modi-i Surinamese Tir,

Chandrikapersad Santokhi aser Guyana Tir, Mohamed Irfaan Ali na den senden balala amen; item senden nung linük tsüngda defence, digital technology aser capacity building tsütsü amalitepa inyaktsü asoshi jembio.

Pravasi Bharatiya Divas (PBD) senden mapang Modi-i lenir ana denji jurila senden amen.

Santokhi aser Ali na Pravasi Bharatiya Divas (PBD) sentong nung ka tongti tejaoker aser ka tetushi tejaoker ama adener.

Ato kilonser Modi-i Santokhi ajurua senden amenba dak sendakba nung Ministry of External Affairs (MEA)-i, lenir anati hydrocarbons, defence

asur maritime security tsütsü amalitepa inyaktsü atema jembio, ta metetdaksü.

PBD tembangba sülen Santokhi-i Ahmedabad aser New Delhi na semdangtsü.

Modi aser Ali na senden amenba dak sendakba nung MEA-i, lenir anati energy, infrastructure development, pharmaceuticals, healthcare, technology aser defence tsütsü amalitepa inyaktsü asoshi jembio, ta metetdaksü.

"Lenir ananti India aser Guyana nung tsüngda akhidang nungi tenzüka küm 180 tashi tesendaktep junga aliba atema jembio aser maneni tesendaktep tajungba akümtsü atema inyaktsü bangjemogo," ta MEA-i metetdaksü.

Ali-ia Delhi, Kanpur, Bengaluru aser Mumbai yimitem semdangtsü.



January 09, 2023 nü Chennai nung Tamil Nadu state assembly senden mezüngnü Tamil Nadu Angh-i jembiba mapang ruling party teloktep nung aliba MLA tem longkak aita kimai aluba sülen osangbenertem den jembiba noksa nung angur.



# TIR YIMYIM

## YIMOBILEM (EDITORIAL)

DIMAPUR SANGTENNÜ, AENJETI (JANUARY) 10, 2022

### Atidangba Mongpu Ka

- Tangsen Lemtur

Tawa asen Ao lima nung Arogo katibo 'Election mapang telok balalai agütsüba tenla Arogoi khenyongi magizüktsü' ta jelia sangdongogo; ibaji Arogo ajak asoshi tatishitsü tajung ka asütsü. Memetet dangashi yamaji Arogo aikati sangdonger alitsü südi, mesüra mesangdong yonga election mapang telok balalai agütsüba tenla magizüki alitsü südi. Election mongpu ya atangji tamangertem atidangba mongpu ka lir aser iba mongpuji tongogo. Asen lima nung election merüka magitetba aser election menen agi kangshiba reprangteta election merükteta agitsü nükjidadong nung küm terka tejaklen 'Clean Election' mapatong tenzüka liasü. Nagaland nung 2013 küm assembly election agitsü lia 2012 küm June ita nung Clean Election mapatong tenzük, anungji iba mapatong tenzükertaküm küm 11 abensatsü mapang ana nung lia Nagaland state assembly election agitsü. Election agiba shia aikati election süitsü yongyar, aser ibaji tsükchitep, raratep aser azüdokshiba tensa süngjemdaksünüba agi lir, ta angateter. Shidakba agibo election ya yimsüsürtem shimtsü atema Tsüngremi asenok nem agütsüba akhümket maongka lir, ajisüaka asen nüburtemi iba akhümket maongkaji mangatetbayong election ya tatidang ajuruba mapang ka dang kümdaktsür, temenen menaba mapang ka, tsükchitep atenba mapang ka aser sen aazükba mapang ka dang kümdaktsür. Election bo tembangtsü saka kinünger-adianu tsüngda, kin-kidong tsüngda, yimer-yimsanger tsüngda aser yim o yim na tsüngda tsükchi atenba election züboboba mapang talangka maneper! Election menen agi asen lima yareta shirangba reprangteta election merüka agitsü ya Arogo teinyaktsü shilem ka, ta tangatetba nung NBCC-i ayongzükba 'Clean Election' mapatong nung asen Aoer yakbang ser inyaka arudar. Yaküm Nagaland Baptist Church Council (NBCC)-i "Kibuba madang aser nisung madang kechi shidak, aji inyaktsü" (2 Korint 8:21) omen nung ajemdaker Clean election poster campaign tenzüka aser asen lima nunga ABAM-i Clean Election Movement (CEM) tenzüka Clean Election Committee-i asen lima constituency ajak sema Arogo lenirtem, yimsüsürtem aser lokti tentet balala nungi lenirtem ayongdena clean election sensitization sentong agiogo. ABAM-isa CEM sentong ya Kohima aser Dimapur area nung alirtem Aoertema atema ayongzükba kaogo. Joko kobi melii election agitsü aser iba ya talisa tamangertem atidangba mapang ka asütsü. Election nung sen temai adoka amshir aser aikati pei vote sen yong yoka achir. Alima nung senso ka asoshi maaksü aser tamashi mapaji ibai asütsü. Pei vote yoka achibaji pei temeden yoka achiba den kasa aser ibaji temenen mapa ta aikati angateta lir saka aika tatidang nung tsüker. Tamangertem iba tatidang nung metsüktsü mita alitsüla. Karibo clean election nükjidadong ya kodanga mataloktsü aser asen nüburtembosa memelenshitsü, ta jembir, saka asenok melung ajema melili. Iba tongbang ya khenyongibosa makoktsü saka ABAM Clean Election Committee züngsemtemi anir lenir aikati nüken-belema nübo, rongsen aser shisa tenlaa clean election atema bendanga agüja inyakba mapa ya amajokbosa masütsü ta amanger. Atangji tang tashi nungbo clean election tongbang nung takok mangu saka tamakok-a mangu, kechiyong asenok tongbang nung maneni nokdaka lir.

# OLEMSABANG

## 2023 küm koda lia aotsü sentong renemer ?

- L. Kika Pongener.

(Yashi adok nungi...)

**Sorkar** : Tesuiba küm asen Naga lima nung otsüsutsü sua opposition maliba sorkar ka yangluogo. Sorkar ka nung opposition malibaji Democracy yayim nung tongtipang shilem ka agi mabensa asütsü. NPF MLA shirnok rulling sorkar den oa loktep, parnoki opposition maliba sorkar ka yanglubaji, nujiso bushiba mapa tatempang telemtetba ka agiba nung kecha tetsükdaktsü mekai agitsü atema lokteper ta nuburtem dang shiogo. Ajisuaka, tanü tashi nung nuburtemi parnoki jembiba ama mapa agi inyakba kecha mangur. Terasatsüka, asen Naga nung nujiso bushiba mapa ya aposhia-aposhia aposep amai dang küma oadagi. India nungeri asen Naga nung nujiso atema tatempang telemtetba agitsüba ya "Danu-i Koya ngosetsü atema khen chiokli ano khen tebang nung mangumer rakshili...ta asayaba amai dang mesushidagi". Aji oda, iba nujiso bushiba mapa ya kodangang telemtetba ka dangi arutsü'ar nuburtemibo ongko madokteti kümadokogo. Anungji 'Elected Member'-temi shitakba nujiso bushiba nung tatempang telemtetba ka agitsü atema mulungteter bendanga agüja inyaker sura, Elected Member ajaki pei amenba menden toktsütsüla (Mass resigned) aser nujiso bushiba mapa ya tatempang telemtetba 'Solution' kati maru tashi Election magitsü ta shitettsüla. Terenlok mapa tsütsü reprangdangra mapa tasen inyaktsü long (Foundation stone layout) azüngbabo aika, saka mapa renemer semzükba/lapokbabo kar dang. Nubur matsüngdang yimjak nung yimyim ayimoktsüba den mapa inyakba khenyongi meputep. Center sorkar nungi terenlok atema sanction agütsüba aika angur/angashir, saka mapa inyakbabo ishika dang. Terenlok mapa nungdem nung aruba sen agi kar dang takar akümer. Anungji asen Naga nung Politician-temi anir nutsüng nubur ajaki nujiso mapa ya tatempang 'Solution' ka magi tashi Election magitsü ta tasüita shitettsüla aser Election nung Political Party katia shilem magitsüla.

**Election** : Taküm February - March tsüngda asen Naga lima nung General Election agitsü amai Election Commission-i sangdongba osang kaket nung angur. Anungji shitakba Election ya agitsübasa sura, tang election nungbo nubur ajaki senyong pei temeden vote mayoktsüla aser jila/yimsüng nung yimsusurtem-ia candidate dang sen meshia magi aremstsüla. Tang 2023 Election nungbo arogo tenzükertem, arogotsür, lanurtem aser laishirtemi anir Election Canvassing nung sen alemba, yi shibelenba, yi ajemba, party-party tsüngda raratepba, item tesempatsü mapatem inyakba ajak ya tenuk yoka reprangtsüla aser takok tashi longjemmer nokdangtsüla. Akok ka asünungbo, Polling anogo nung arogo nung toklang tenzükerti anir arogotsür, lanurtem aser laishirtem Polling Station shia nung nubur lemsar oa, nisung kari dang yimer ajunga meyong Vote ajanba (Proxy) tenuk yoka reprangtsüla, Polling Station nung sen alemba nokdangtsüla, Party kari/telok kari Polling Station Coup asütsü merangba nokdangtsüla, party - party tsüngda raratepba, yamala mapatem ajak nokdangtsüla. Aji oda, arogo nung toklang tenzükertemi anir tenzükertem/tenzüklatem aser lanurtemi aser talisa laishirtemi anir iba amaji inyaktet nungbo 'Clean Election' mapa ya asangsang nung mapa küma takok ngua inyaktettsü takoktsü lenmang sadem-sadema lir. Aji oda, yamaji inyaktet nungbo Election nung takok angurtema sentsüh kecha mekai adoktsü, tamakok angurtema Election sentsüh kecha makatsü. Ajiser, shirnok adokdir, adoker külenji shirnoki ochishia yimsu masür parnok dangji nuburtemi na ojang dang suang, na anenadokang...ta indang-indanga shitettsü. Aji oda, arogo nung toklang tenzükertemi anir tenzükertem/tenzüklatem, lanurtem aser laishirtemi nungsen aremayamaji inyaktet nungbo, asen Naga lima ya khenyongi balaka melenshitsü. Asenoki aiben asenokbo junger sernung Election inyakyim ya dang majung amai bilemer aser bangbettsü amai jembir. Ibajagi asenoki Election meruka agitsü indang kanga suoki yia jembir, saka kanga junga shisadangra, Election-ji meruktettsüba masü, saka asenok meruktettsüba ya tongtipangba lir. Asenoki Election mapang nung chidiyungdiba nungi asüngteta alitsüla, supokrem aser rongsen meshia magi aremstsüla, asen temeden vote-ji ochishia agütsütsüla, nisung kari/telok kari yimer ajunga vote tashiyim amshia ajanba, ibala mesukba mapa shingai meinyaktsüla. Asenoki item mapatem nungjagi asüngteta/merukteta litetra/inyaktetra ibaji dang chichiba 'Clean Election'-ji asütsü. Aji oda, Election melenshitsüba masü, saka asenok melenshitsüla. Anungji Election ya agitsübasa sura, tang 2023 Election nungbo iba amaji inyakdangdi ta nubur ajak dang ayongzükertem.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

# Longkong yimdak Khrista yimsü arur küm 100 jungogo



ABAM executive secretary, Rev. Dr. Mar Pongener-i Longkong Baptist Arogo centenary nüngtem yangluba nüngshilung semzüksüba sülen tangokba noksa nung angur. Mokochung, January 09, 2023.

**Mokokchung, January 09 (TYO):** Longkong Baptist Arogo Centenary mung sentong January 7-8 anogotem nung "Tsüngremer Taochi Sangdongdi" (2 Timoti 2:1-2) omen dak rangloker Longkong yimdak takok ngua mungogo.

January 8, 2023 nü Longkong Baptist Arogo centenary nüngtem Tenla kima nüngshilung ka Ao Baptist Arogo Mungdang Executive Secretary, Rev. Dr. Mar Pongener-i sarasadema azüngtsüogo.

Iba sentong nung ABAM Executive Secretary, Rev. Dr. Mar Pongener, Kohima Ao Baptist Arogo Senior Pastor, Rev. Sentisashi Aier, Aoyimsen Baptist Arogo Pastor, R. Imti Imsong aser Oriental Theological Seminary Bade, Dimapur nung tesayur Dr. Pangernungba Kechu parnok tongti o jembirtem liasü.

January 8 nü anepdang tekülem sentep nung ABAM

Executive Secretary, Rev. Dr. Mar Pongener-i centenary omen nung ajemdaker jembidang pai, nai/ni Pa taochi ajangshiba/menakdanga alibatemji asenoki tangar dang kuli asütsüla, ta ashi.

Joko kobi melii asenoki election ajurutsü, ibai tamangertem asoshi tamang atidangba mapang ka asütsü, idangji asenoki Tsüngremer taochiji koda sangdonger, ta pai asüngdanga ashi.

"Ochi aser atangji" nung Tsüngremer taochi indang sangdongtsü aser Pa taochi nung alitsü asoshi paisa tensa den apet Lai O nungi onük tajung aika bener arua lokti ayongzük.

Nagaland PWD (Work & Housing) Minister, Tongpang Ozüküm-i salem o tatsüka lemsatepdang, tsürabur shirnoki Khrista Osangtajung agizük, parnok nem tetushi agütsüba den külemi Longkong nunger dak tongmelang aser ochi,

meranga inyakba, yim meimba, kati ka akhümtsübutepba aser telungjem aliba pai ajitetba yimya kar ashi. Anungji, item yimya tajungtemji tarutsü nunga teti benshitsü ajungshia liasü.

Jubilee ya yimjung yanglushiba aser ajungketba mapang ka lir, anungji tashimait kar danga lira centenary tenüng nung kati ka dang tai tokteper tesentaktep tajung yanglutsü asoshi paisa tayongzükba ka agütsü.

Anepdang tekülem sentep nung Pastor Lolenliba (Süngratsü) chirnur, Longpa Baptist Arogo Pastor, taoba LBA pastor Imtionen, taoba Minister M. Jongshi Jamir parnoki salem o den mulungnen o tatsütsü lemsatep aser centenary choir aser Kohima Longkong Tamang Telungjem nati ken ajanga osang aben aser Kr. Libena Imsong-i centenary sangro ka zünga tesenteper ayongzük.

# France nung Evangelical Arogotem aser Khristantem renlokdar

**January 09, 2023:** National Council of Evangelical Christians (CNEF) indang report ka ajanga France nung Evangelical Khristan Arogotem kanga renlokba osang metetdaksü.

Küm pongu tejaklen France nung alir 29,000 shia atema Arogo kaka dang liasü. 2017 küm France nung evangelical Arogo 2,521 liasü saka tanübo Arogo 2,700 dak tema lir.

1970 küm nungbo France nung Evangelical Arogo 769

dang liasü, ta CNEF-i metetdaksü.

Tesüiba küm 50 tsüngda France nung küm shia evangelical Arogo 35 shi dang renloka liasü saka tangbo küm shia Arogo aika renloker.

Evangelical Arogotem rongnung teimtibaji Assemblies of God France lir (Arogo 530), iba sülen tanabubaji Independent Arogotem (308) lir.

Evangelical Arogotem renlokba dang masü saka Evangelical Khristan

nütsüng-a kanga renlokdar. 2017 küm France nung evangelical Khristan 650,000 liasü saka tanübo evangelical Khristan nütsüng 745,000 dak tema lir.

CNEF-i ashiba agi, 1950 küm nungi tenzüka tang tashi nung France nung evangelical Khristan nütsüng arenbaji 15 ben agi teimba renlokba lir.

France nung denominational group mesüra federation balala nungi Arogotem shilem 70 bo CNEF nung züngsem lir.

# ANOGO ABEN TSÜNGREM DEN

## Takok Sülen

### T.Ken 60: 1-12

"Tsüngrem ajanga asenoki tasü itta raratsü kechiaser Pai tsükchirtem madak ajemshitsü" (t.12). T.Ken 60 ji yimya masü kechiaser Dawidi iba ken pa timtem nung aliba mapang züluba masü. Pa ken aika lungpok alidang mesüra tongpang rara nung alidang zülu. Saka iba ken ya takok tulu ngur külen zülu. Tsüngrem asoshi armyi Edom nung takok tulu angu.

Iba ken nungi asenoki kechi angazüker? Mezüngbuba, takok sülen asenok kümdangtsüla. "Oh Tsüngrem nai onok sendokogo, nai onok raksatsüogo, na ain adoka liasü, saka tang onok dangi meyipang!" (t.1). Dawidi Tsüngrem dang ayimten aser ashi, "O Tsüngrem, onoki takok tulu nguogo. Saka ano idakji tongpang raratsü lir." Tsüngrem nübur tulu takok tulu ngur külen tamakok tulutiba angur. Eliaji Carmel Tenem nung takok tulu angu, aser iba sülen tasü meiti aküm aser tamakok tulu nung timatem. Asenoki tongpangji koker külen takok angutsü kümdangtsüla.

Tanabuba, asenoki teti Tsüngremer nisan amer. Takokji tembanger külena asenok Tsüngremer tongti tenyartem lir. "Saka shirnoki na tsübur parnok nem tekümdangtsü ka nai agütsüogo, anungji teraksatsüba nungi parnok kümzüksü" (t.4). Asenoki ochiba nisanji amer kechiaser asenoki Tsüngrem O asoshi noktaker. Asenoki takok ngur külen asenok nisanji matsüzükli. Asenoki ibaji maneni Tsüngrem sentsüwangshi asoshi amdi.

Tasembuba, Tsüngrem nem asenoki sentsüwangshi agütsütsüla. Dawidi Tsüngremi kechi inyak ibaji asoshi tetushi ajak Pa nem agütsü. Asenok asoshi takok akhangtsübaji temela. Takok ngur külen ibai ashitsü temela, "Ibai ni inyak."

Tsüngremi takok agütsür külen ne dangi amajok mapang ka arur, kechiaser nai mita malitsü akok. Aser tamajungbai na amaktsü mita atar. Nai takok tamaittsüji koda ajentsü? Teti Tsüngremer nisanji amang aser Pa nem tenüngsang agütsütsü tejangja süang. Tanaben Tsüngremi ne nem takok agütsütsü. Pa O ochi nung noktakang, aser asüküma bilem ajak temulungjangi maitdaksütsü kümdanga liang. Tenüngsang ajak Tsüngremi agitsü tetemsü.

# France nung Evangelical Arogotem aser Khristantem renlokdar

**January 09, 2023:** National Council of Evangelical Assemblies of God France lir Christians (CNEF) indang (Arogo 530), iba sülen report ka ajanga France nung tanabubaji Independent Evangelical Khristan Arogotem (308) lir.

Arogotem kanga renlokba Evangelical Arogotem osang metetdaksü.

Küm pongu tejaklen France Evangelical Khristan nütsüng-nung alir 29,000 shia atema a kanga renlokdar. 2017 küm Arogo kaka dang liasü. 2017 France nung evangelical küm France nung evangelical Khristan 650,000 liasü saka tanübo evangelical Khristan nütsüng 745,000 dak tema lir.

1970 küm nungbo France CNEF-i ashiba agi, 1950 nung Evangelical Arogo 769 küm nungi tenzüka tang tashi dang liasü, ta CNEF-i nung France nung evangelical metetdaksü.

Tesüiba küm 50 tsüngda ben agi teimba renlokba lir. France nung küm shia France nung evangelical Arogo 35 shi dang denominational group mesüra renloka liasü saka tangbo küm federation balala nungi shia Arogo aika renloker. Arogotem shilem 70 bo CNEF nung züngsem lir.

AO OSHI ANGAZÜKDAK:

TANÜ ANGAZÜKTSÜBA OJANG

Ongliang

(n) alu arotsü mapang ongliang ongliang ta asaba sangken (type of lizard)

\* Ongliang ya nisung agi aküm ta tsüraburi jembir.

Ongmang

(n) arem, tokong aser tenem aliba alu mang ( body of field)

\* Tsüraburtemi ongmanj tajung repranger yim aküm.



Tir Yimyim

OLONG PAITEP # 6395

Grid for OLONG PAITEP # 6395 with numbers 1-24 and some cells shaded.

TIPIEN

- 1. Saku - (4)
6. Songjen - (7)
7. Mali/Tazung - (4)
9. Tasen apok - (6)
11. Songtem - (3)
13. Ata liasü - (5)
16. Tzunglu den külemi tsüker - (3)
17. Aso tila - (6)
20. Tashi maküm - (4)
24. Tenung kasa jatepba - (7)
25. Ki yangluba oset - (4)

LANGTSÜNGLEN

- 1. Taksep - (3)
2. Langtem - (5)
3. O tamendaktak - (4)
4. Nütsü tebuba - (3)
5. Anungdang tesangwa - (3)
6. Apitet - (5)
7. Yagi jungdaksür - (4)
8. Anogo semer ka - (3)
10. \_ \_ \_ tatsü - (3)
12. Tebur kidong aser zünga kasa tsungda jatepba - (4)
14. Pela agizükba tapu ka - (5)
15. Tenung atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 6394 TELANGZÜBA

TIPIEN :

- 2. Pongsen, 5. Lepko, 7. Omen, 8. Maongka, 10. Yangkhu, 12. Senpong, 14. Angu, 15. Raksa, 16. Arameso,

LANGTSÜNGLEN :

- 1. Alimang, 2. Pongen, 3. Samaru, 4. Nün, 6. Pio, 9. Nungdak, 10. Yongya, 11. Kongro, 13. Ora, 14. Ata.



POLICE KATI ALOKBA YIJEMER AJURUR :

- Police : Na shiba?
Alokba : Ni Alokba.
Police : Na kong alir?
Alokba : Ni tsürabur den alir.
Police : Nü tsürabur kong alir?
Alokba : Kü den.
Police : Nenok ajakji kong alir?
Alokba : Külemi ki ka nung alir.
Police : Nür kiji kong lir?
Alokba : Ozü kidangsür ki anasa lir.
Police : Nür kidangsür ki ji kong lir?
Alokba : Ni ashi nung nai amangtsüa na?
Police : Odang shiang.
Alokba : Ozü kidangsür kiji ozü ki anasa lir.
Police : Nonsense Alokba!

- Lilir : WhatsApp

Tanur asoba anogo nung salem osang den noksa angati adokdaksünura - Tenung, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenung : .....
2. Tasoba anogo : .....
3. Küm : ..... 4. Class : .....
5. School : .....
6. Talidak : .....
7. Salem osang : .....

Taoba Manipur chubatem nem naro yuja tetushi agütsü



Taoba Manipur chubatem nem naro yuja tetushi agütsü dang tangokba noksa nung angur.

Imphal, January 9, 2023 (Agencies): Manipur titular King aser Rajya Sabha MP Leishemba Sanajaoba lia Manipur Rifles indang telok kati Manipur nung taoba chubatem nem tetushi agütsü.

Iba sentong ya Manipur State Archaeology, Department of Arts and Culture, Government of Manipur ajanga ayongzük. Chuba Gambhir Singh ser küm 189 buba ajungba tenung nung Hombarnü Langthabal, Imphal nung pa indang Samadhi nung iba sentong agi.

Iba sentong nung Manipur chief minister N Biren Singh-i

anir council of ministers aser ketdangsürtem den nisungtemi King Gambhir Singh, king Narasingh aser king Herachandra nung nem tetushi agütsü.

Parnok lenisüba kübok Manipur nungeri Burmese (now Myanmar) nung den Manipur nüjiso atema rara.

Burma-i 1819 nungi 1826 tashi Manipur yimli atsünger yimsü süa liasü aser iba mapang Manipur tia kanga mejungi liasü. Iba mapang dang 'seven years of devastation' ta ajar.

Chief minister N Biren Singh-i king Gambhir Singh, king NarsinghandSana aser king

Herachandra nung nem tetushi agüja jembidang "asen oboula nungeri Burmese nung meindokba aser 'Seven Years Devastation' anendaktsüba ajanga tanü asen lokti lir" ta ashi.

Iba sentong nung Manipur Rifles indang contingent kati guard of honour agütsü, Dhop Pala performance aser tarpon offerings ama shilem agi aser Chief Minister Biren-i cafeteria ka lapoktsü.

Sentong nung titular Manipur king & MP Maharaj Leishemba Sanajaoba, MLA tem, DGP P Doungel, ketdangsürtem aser nübortem aden.

Reliance Jio-i tanü Guwahati nung 5G service tenzüktsü

Guwahati, January 9, 2023 (Agencies): Telecom company Reliance Jio-i Mongulbarnü Guwahati nung 5G services tenzüktsü.

Mongulbar nikongdang 2.30 ako nung Assam Chief Minister Himanta Biswa Sarma-i Dispur nung Jio True 5G service lapoktsütsü.

January 6 nü Reliance Jio-i

India nung yimti pezü- Gwalior, Jabalpur, Ludhiana aser Siliguri nung 5G service tenzükta liasü aser itemji züngsema Jio indang 5G services yimti 72 nung tenzükogo.

Jio-i yaküm October 4 nü Delhi, Mumbai, Varanasi aser Kolkata nung fifth-generation mobile system (5G) services tenzükta liasü aser iba sülen October 22 nü Nathdwara aser

Chennai nung tenzük.

Yaküm November 10 nü Jio-isa Bengaluru aser Hyderabad nung 5G services tenzük aser tasüngji Gurugram, Noida, Ghaziabad o Faridabad nunga tenzük.

Pune nung November 23 nü Jio 5G services tenzük aser November 25 nü Gujarat kübok district 33 nung tenzükta liasü.

Karimganj nung Bajrang Dal züngsem ka tepset; 1 apu

Guwahati, January 9, 2023 (Agencies): Assam kübok Karimganj district nung Bajrang Dal züngsem ka tepsetba atema police-i nisung ka puogo.

Arishi küm 16 tain Bajrang Dal züngsem Sambhu Koiri ya Deobar nikongdang Lowairpua nung tepset, ta police ketdangsür kati ashi.

Hailakandi district nung Bajrang Dal indang training camp ka nung dennür meyipa arudang Koiri tepset.

Iba tatalokba sülen nisungtemi Bazaricherra Police Station kima nung adenshir lungkak ait aser parnoki Koiri tepsetertem aputsü atema takhangba agütsü.

Iba tatalokba atema January 9, 2023 nü Karimganj district administration-i section 144 ozüng agütsü.

"Lendongji January 8, 2023 nü atalok aser tensa mejungi akümstü ama ajitetba agi Cr. P.C. u/s 144 kübok ozüng agütsür" ta Karimganj Deputy Commissioner office-i metetdaksü.

Republic Day Parade nung Arunachal Pradesh-i shilem agütsü

Guwahati, January 9, 2023 (Agencies): New Delhi nung Republic Day 2023 amongdang Arunachal Pradesh-i Tableaux Parade nung shilem agütsü.

Iba atema Singpho Development Society president Jowkhong Singpho-i anir

züngsem 8 agi akümba Singpho telok ka January 11 nü New Delhi-i aotsü.

Republic Day 2023 indang Tableaux Parade nung Singpho nung 8-i sobaliba subotsü agir shilem agütsü melar. s COVID-19 dose anaprong

agiba vaccination certificates alirtem dang iba sentong nung shilem agütsü melar.

Kümshia January 26 nungi tenzükter anogo asem tashi Rajpath, New Delhi nung parade agir aser iba ya Republic Day benjungmong nung tongtipang shilem ka lir.

**Bolsonaro pusemertemi Brazil nung sorkar office tongtibangtem amak**



Taoba Brazil tir Jair Bolsonaro pusemertemi Brasilia nung National Congress building amakba noksa nung angur. Longkak aiterem shirnoki Jair Bolsonaro election nung tamako anguba magizükteter parnoki tir Luiz Inacio Lula da Silva mapa nung tenangzüktepba agiba sülen hopta ka lir Congress, Supreme Court aser presidential palace maka liasü.

**Brasilia, Aenjeti/January 9 (Agencies):** Taoba Brazil tir Jair Bolsonaro, shibai tang tashi election nung tamakok anguba magizükteti lir, pa pusemrtmi Congress, the Supreme Court aser presidential palace maka liasü. Tir Luiz Inácio Lula da Silva-i mapa agizükba sülen hopta ka lir tang iba mepetmesü adokogo.

Deobarnü longkak aiter aikati security-i tenokdangba agütsür aliba nongpoka ai, kilemi soa atu, kichibatem raksatsü aser linük yimtiba Brasilia nung ki asemprongla maka liasü, koba hopta tatemi kitem timba tazüing liasü.

Longkak aiterem karibo Bolsonaro tanaben tir kümdaktsütsü mesüra Lula tir mapa nungi agintsü asoshi military-i teyongtsüü aitsü khanga liasü.

Sao Paulo state nung osangbenertem den sensaksemba mapang, longkak aiterem ajungmesoba atema Lula-i Bolsonaro aitsüogo aser pai federal district nung security aziöktsü atema federal sorkari telemtetba tasen ka yangluba zünga metetdakja liasü.

Bolsonaro, shiba Lula mapa nung maniok tsüingda Florida-i ao, pai iba taitsuba ya Deobarnü nikongtsütsü telagzüba agüja liasü. Pai Twitter ajanga, yimjung nung longkak aibaji democracy nung shilem ka lir, ajisiüaka nüburtem meyong ki balala amakbaji tim masü.

Deobarnü longkak aitertemi amakba kitem meyipa agitsü atema police temi tear gas khaloktsü, koba television nung sayua liasü. Video nungsa presidential palace nungi longkak aiterem pur aoba sayuogo.

Deobarnü police-i Twitter ajanga linük yimtiba Brasilia nung Bolsonaro pusemertemi election nung tamakok anguba magizükteti sorkar office balala amakba sülen nisung 300 shi puogo, ta metetdaktsü, koba küm ana tejakdang taoba US tir Donald Trump pusemertemi United States Capitol amakba den mesükteper liasü.

"Tatembangbuba nisung mapu tashi ken o maneni bushisüingdangtsü," ta police-i tenangzükba agütsü.

Iba lendong nung nisung asüba mesüra yiruba osangbo kecha mali, saka longkak aitertemi parnok aolen teraksatsüba tulu bener arutsüogo. Parnoki presidential

palace nung kichiba raksar alibatem nungi furniture tem merepzüka yok aser Congress shilem kar sprinkler system ajanga metsüingdaktsüba den Supreme Court nung ceremonial room ajasaja liasü.

October 30 nü election akokba sülen Bolsonaro pusemertemi longka aita arudar. Parnoki lenmang nokdangba den garitem rongtoktsü aser military kitem kima adenshia armed forces dang teyongtsüü ia inyaksangshitsü khanga aruogo. Bolsonaro aser pai aniba political party-i electronic voting machine tem nung agütsüba vote ya timba magi akümtsü atema mepeshiba Brazil nung electoral authority tekolakbai magizük.

Sorkar office balala amakba ya alima ajunga nung lenirtemi

aitsüogo.

US tir Joe Biden-i iba tatalokba ya democracy anema inyaksangshiba lir ta ashiba den Brazil nung democratic institution tem Washington-i pu asemtsü ta ashi.

European Council tir Charles Michel-i Twitter ajanga iba tatalokba aitsüogo aser France tir Emmanuel Macron-ia, Brazil nung institution tem akümtsübuttsü ayongzükba den France-i Lula pusemba metetdakja liasü.

Kasa mapang nung Chile tir Gabriel Boric-ia iba tatalokba aitsüogo aser ashiba agi, iba inyakyim ta tasümit inyakyim ka aser democracy anema lir. Mexico tir Andres Manuel Lopez Obrador-i iba tatalokba ya sorkar coup asütsü merangka ka lir ta ashi.

**PELABA LEMSATEPER**



**Late A. Imdong Jamir (Molungyimsen) (31-10-1937) - (04-01-23)**

Onoki teti meima aser akhümtsüba aliba tsürabur **Late A. Imdong Jamir** mapang tatsüka temang timtema lia arur iba akümüli arishi tembanger teti tatem makadak lima nung alitsü tebu Tsüngrem dangi aoba anogo tashi nung kija aser lokti balala-i ozü kinungertem den tamang sarasadem, rongsen aser nübo agi yaritepa atema kanga pelaba lemsateper.

1. Doctors aser nurses GNRC, NEM Care (Guwahati), Olive aser Faith Hospital (Dimapur).
2. Sungkomen Baptist Arogo.
3. Aokong Council Dimapur
4. St John Higher Secondary School, Dimapur
5. Dimapur Molungyimsen Fellowship
6. Dimapur Molungyimsen Senso Telongjem
7. Molungyimsen Senso Union Mokokchung
8. Molungyimsen Baptist Arogo
9. Reongsanger Putu Molungyimsen
10. Molungyimsen Arogotsur
11. Chungtia Baptist Arogo
12. Longkhum Fellowship Mokokchung aser Dimapur
13. Longkhumtsur Telongjem
14. Longkhum Baptist Arogo
15. Mangmetong Fellowship, Mokokchung
16. Chumukedima Ao Baptist Arogo

Iba den kija kibongtem kwikati onok mangyim jashi tia nung alidang yariogo, nenok ajak dang tsüingdong arua pelaba melemsatet nung iba osangkaket ajanga nenok ajak dang teyaritepa mapa tajung asoshi maneni Tsüngremi moajangma ta asübaji ozü kinungertem tamang sarasadem.

- Temeim kinungtsü, chirnurtem aser kinungertem.

**7th Buba LONGPOK SEMCHIR TELONGJEM Inti Mungdang**

Anogo : 12th & 13th January 2023  
Tesentepdak : Ungma



Omen : Lipok Tamendakdak Arangshi

**KETDANGPURTEM**

1. Tir : Wb. K. Nokmarenba (Longsa)
2. Tatong Tir : Wb. Imnekenba (Longjang)
3. Tongti Zülur : Wb. Imkongnungba Lkr (Merangkong)
4. Repsem Zülur : Wb. Bendangwati (Waromung)
5. Sen Zülur : Wb. Lanuwapang (Khar)
6. Sen Repsem Zülur : Wb. Amongsang (Longkhum)
7. Kimen : Wb. Mepulemba (Mopungchuket)

**12th January, 2023 Nikongdang Senden Sentong**

Mapang : 4:00 PM

1. Menden : Ketdangpurtem
2. Sarasademtsü : Wb. Takowati, Associate Pastor, Ungma Baptist Arogo, Lozütang Fellowship
3. Menden Okila : Tir
4. Pela Agizükba : Wb. Temsüzenba Longkümer, Tatar Ungma
5. Metetpela Mapang : Tatong Tir
6. Nüingdak Mapang :
7. Tepela O : i) Chairman, Ungma Village Council  
ii) Tir, Aoli Pongen Mungdang
8. Sobaliba Ken Ka : Merangkong Longpok Semchir Telongjem
9. Onük : Tanü Putu Nung Kidong Teinyaktsü  
Tejembir : Dr. M. Temjen Lkr (Mopungchuket)  
Former Head of Deptt & Asstt. Professor of Sociology, Alder College Kohima.
10. Tatem Sarasadem : Telok

**13th January, 2023 Anepdang Senden Sentong**

Mapang : 9:00 AM

1. Menden : Ketdangpurtem
2. Sarasademtsü : Rev. Dr. Noklen, Pastor, Ungma Baptist Arogo
3. Nüingdak Mapang :
4. Tayongzükba O : Wb. Sharingangin, Hon'ble Speaker Nagaland Legislative Assembly
5. Tepela O : i) Wb. S. Chuba Longkümer (Chuchuyimlang) Former Parliamentary Secy. Nagaland  
ii) Tir, Longjakrep Semchir Mungdang
6. Sobaliba Ken ka : Elangtsür, Ungma Longpok Semchir Mungdang  
Tanir : i) Mrs. Imtisangla ii) Mrs. Kirenmongla
7. Mungdangti asoshi tenla sarutsü :
8. Onük : Lipok Tamendakdak Arangshi  
Tejembir : Tebu Teti Aochuba, Longsa
9. Tatem Sarasadem : Telok

**7th Buba Longpok Semchir Telongjem Inti Mungdang Poksütsür: Wb. Sharingangin, Hon'ble Speaker, Nagaland Legislative Assembly aser par kibong**

**13th January, 2023 Nikongdang Senden Sentong**

Mapang : 2:00 PM

1. Menden : Ketdangpurtem
2. Sarasademtsü : Rev. Dr. M. Rongsen Lkr, Akhoya
3. Nüingdak Mapang :
4. Osangtem agitsü : i) Tongti Zülur Osang  
ii) Sen Zülur Osang  
iii) Audit Osang  
iv) Tebouren Otsü Kaket Luden Osang  
v) Fund Raising-cum-Site Search Luden osang  
vi) Nüingtet Luden Osang  
vii) Pangzüing Luden Osang
5. O Lemtepba mapang :
6. Ketdangpur melentepba : Tanir, Convenor, Nüingtet Luden mapang
7. Melepzüing O : i) Wb. L. Alemtemtsü Ao, Convenor Planning Committee  
ii) Dr. Rongsensusang, Convenor, Local Planning Committee
8. Enküp O : Wb. Lipokzülu, Tatar (Ungma)
9. Menden Tatem O : Tir
10. Tatem Sarasadem : Telok

**TEMETETSÜ**

1. Mungdangi arurtem tanendak aser chiyongtsü ajak Longpok Semchir Telongjem Ungma ajanga agütsütsü.
2. Mungdangi arur ajak Registration Fee Rs. 50/- agitsü
3. Yimtsüing shia nungi kilen saru Rs. 100/- Mungdang sentepba aonungsa ketdangpur ket tongjang. Jila nung alirtem ajak aki ama pei pei yimtsüing ajanga dang kilen saru agütsütsü.
4. Mungdangti asoshi tenla ken sarutsü.
5. Sentong ajak nung O jembiri minute metsür pungo (25 Mts) aser tepela o jembiri minute tenet (7 Mts) agitsü melar.
6. Agenda kar lira 10th Jan. 2023 anogo tashi nung ketdangpur ket tongjang.
7. Yimtsüing aser unit shiai lemsüktsüba nübu ajak medema arutsü metetdaktsür.
8. Mungdang mapang teimsür Longpok Semchir telongjem Ungma alitsü.
9. 13th January mezüing senden sentong temer Soyim, Langpang Lenden nung Kimak alitsü, iba sülen kasa tesem nung lokti chiyongtsü.
10. Mungdang mapang Oboula semchir indang Waistcoat ayoktsü/alitsü angutsü.
11. Iba mungdang asoshi ajaki sarasadem atadi.

## Mkg. nung T20 Inter Club Tournament Cricket Tournament asayadagi



Mkg. nung T20 Inter Club Tournament Cricket Tournament tenzükba mapang Chief Patron Mokochung Deputy Commissioner Shashank Pratap Singh IAS mezüngbuba asayatsüpur telok Jovial aser A&K telok den noksa tangoker.

**Mokokchung, Aenjeti/ January 09 (TYO):** Mokochung District Cricket Association (MDCA)-i ayongzüka Imkongmeren Sports Complex Mokochung nung 31st T20 Inter Club Tournament tanü nungi asaya tenzükogo.

Tanü iba asayamung tenzükba sentong nung Chief Patron Mokochung Deputy Commissioner Shashank Pratap Singh IAS-i mapang tatsüka agia jembidang, India sorkar ajanga saisapong nung ajungketa nübur talisa lanur

anitettsü asoshi sentong tajung aika inyaka odagi, anungji asayartemi iba maongkaji agitsüla, ta asayartem ayongzüka ashi.

Alima linük aika nung Cricket Tournament ayongzüker, ibaji ajanga cricket asayartem ajungketa taküm yanglutsür, iba den külemi cricket asaya nung ano mapa balala ataja taküm junga alitsü asoshi lenmang lapoktsür, aji asünung cricket asayartemi cricket asaya ya taküm jenjang yanglutetba asaya ka ama kümdakjang ta Mokochung

Deputy Commissioner-isa tayongzüka agütsü.

Kasa sentong nung MDCA President Imlikumzük-i tarur pela agizükba o jemi aser Viji-iba sentong ketdangsüa agiba den asayamung nung Tsüngrem lenisüba jazüka MTBA Youth Mentor Chubayapang-i sarasadema liasü.

Iba Tournament ya 16-01-2022 nü tashi asayatsü aser iba nung Pool 2 nungi Jovial, A&K, Sovran, Züngamedem, Titans, Trebuchet aser United Brothers ta item club 7-i shilem agia asayatsü.

## Jasprit Bumrah Sri Lanka den asaya nung shilem magitettsü

**Aenjeti/January 9, 2023 (Agencies):** India nung fast bowler Jasprit Bumrah, Sri Lanka den ODI asem asayatsü aliba nung shilem magitettsü.

"Bumrah shiba ODI asayamung masaya tsüngda Guwahati nung team nung adentsü renemer liasü, pa kecha tetsükdaktsü makai bowling ontettsü atema ano mapang tatsüka agitsü. Kümdangshia atatsü atema iba telemtetba ya agiogo," ta BCCI-i sangdong ka ajanga metetdaktüsü.

India nung Australia den February ita Test asaya pezü asayatsü aliba temulungdang yur iba telemtetba ya agi asütsü akok.

Taoba mapang Bumrah ya Sri Lanka den asayatsü aliba ODI asayamung atema team nung züngoksema liasü. Pa teperem yiruba sülen 2022 küm September ita nungi tang tashi nung ken danga asaya mali aser iba mapang nung 2022 T20 World Cup nunga masayatet.

2022 küm India team England nung oa asayaba mapang teperem yiruba sülen Bumrah 2022 Asia Cup nunga masayatet. Iba sülen India nung Australia den T20I asayamung nung asayatsü atema pa shim saka South Africa den asayatsü lia maneni pa teperem nung tashiba ka aliba ashishia liasü aser iba ajanga Australia nung World Cup nung shilem magitet.

India aser Sri Lanka na tsüngda ODI asem asayatsü aliba nung mezüngbuba ya Mongolbar, January 10 nü Guwahati nung asayatsü.

Sri Lanka den ODI asaya asem atema asayartem:

Rohit Sharma (Captain), Shubman Gill, Virat Kohli, Suryakumar Yadav, Shreyas Iyer, KL Rahul (wk), Ishan Kishan (wk), Hardik Pandya (VC), Washington Sundar, Yuzvendra Chahal, Kuldeep Yadav, Axar Patel, Mohd. Shami, Mohd. Siraj, Umran Malik, Arshdeep Singh.

## Australian Open nung COVID tashidak aketera asayatettsü: Director



**Aenjeti/January 9, 2023 (Agencies):** Iba ita asayatsü aliba Australian Open nung asayatsüpurtem COVID-19 tashidak tendangtsü nungdak matoktsü aser tashidak menar liaka asayatettsü, ta asayamung director Craig Tiley-i ashi.

Iba health policy ya lokti nung tang benshiyonga oya aliba inyakyim dak ajemdaker yangluba lir, koba taoba küm ana tashi tenokdangba tesashi agütsür asayamung asayaba dang nungi balaka lir, ta Tiley-i ashi.

2021 küm iba asayamung ya bio-secure bubble ka nung asaya aser lokti nung tashidak menatepyonga aoba sülen asaya repringtsü atema nüburtem nem temelaba magütsü liasü. Kasa mapang nung taoba küm vaccine

magiba atema Novak Djokovic linük nungi meyipa yoka liasü.

"Onoki asayartem aser staff 12,000 tema nem osang tejangja agütsüogo. Kar danga temang manemi kümra ki toktsür maotsü atema shiogo," ta Tiley-i ashi.

"Iba ya onok atema normalised environment ka lir aser cricket dang nungi kecha balaka masü. Asayar karbo Covid tashidak keter asayatsü ako... onoki tang lokti nung inyakyim sülen anidakner," ta pai ashi.

Cricket asayar Matt Renshaw, taoba hopta Covid tashidak potetba sülena South Africa den Test asaya ka nung shilem agiogo.

Renshaw ya mezüngbuba anogo asem külem asayartem nungi pila toktsü ajisüaka negative result aruba sülen

maneni home dressing room-i arudakja liasü.

COVID-19 wara kanga sashia pokteter aliba mapang Melbourne nung tenokdangba tesashi agüja mapang talangka mokdanga ayu, saka tangbo inyakyim meleshiogo.

Taoba küm taoba world number one asayar Djokovic vaccine magiba ajanga Australia nungi meyipa yoka liasü. Pai pa nem taitok agütsütsü asoshi mepeshi, saka sorkari magizük aser ashiba agi, pa ya lokti atema lendong aser vaccine anema nokdakertem pai tali ajungmesotsü.

Iba sülen Australia-i inyakyim melenshiogo aser senzusenpongertem vaccine agir alitsü menügdaker aser Djokovic nema küm asem tenokdangba agütsür aliba aginogo.

## South Africa nung asayar Pretorius asaya nungi anener

**Aenjeti/January 9, 2023 (Agencies):** South Africa nung all-rounder Dwaine Pretorius-i pa International cricket asaya nung anenba osang Hombarnü metetdaktüsüogo.

Arishi küm 33 tain asayar shiba international jenjang nung 2016 küm mezüngbuba asaya liasü, pai format asemprongla nung South Africa tenung nungi asayaogo. Pai T20 International 30, One-Day International 27 aser Test asem nung asayaogo. Pa World Cup-a ana tashi nung asayaogo.

"Anogo ishika tejkadng ni kü indang career nung telemtetba tasaktiba ka agia liasü. Ni international cricket asaya nungi anentsü atema telemtetba agiogo. Ni ina atuba mapa nukjidong ajak agi Proteas atema asayatsüba dang liasü. Ni kodaser asayatet aji mejangja saka Tsüngremi kü nem sempet aser takok angutsü atema temulungtetba ka agütsü. Tanungba ajakji pa kabuma nung liasü," ta Pretorius-i ashi.

"Ni kü career nung tanungba mapang ajak ya T20 aser tanga format tatsütem dak rangloker inyaksangshitsü. Free agent ka asüba ajanga format tatsüba

nung asayar tajungtiba ka akümtsü atema kü nikjidong aliba nung teyari agütsütsü. Iba ajanga kü career aser ozü kibong inyakyim tali tajungba liromedema bener otettsü. Kü indang career nung tongtibang shilem agir ajak dang kanga pelar," ta pai shisem.

Pretorius-isa, taoba South Africa captain Faf du Plessis dang kanga pelaba lemsatet. "Faf Du Plessis dang mejeta pelaba lemsateper, shibai ni International team nungi züngtokba sülen tanaben meyipa anir aru aser ni asayar tajungba kuma asayaba nung teyari tulu agüja liasü, kanga pelar," ta pai shisem.

Pretorius ya South Africa nung bowler tem rongnungi T20I nung run ishiba agütsür wicket timtiba agiba asayar lir. Pai 2021 küm Pakistan den asayaba mapang run 17 agütsür wicket 5 agia liasü. Pakümjisa pai UAE nung ICC Men's T20 World Cup asayaba mapang wicket 9 agi. Paisa, run 261 yanglua liasü.

Pa, Indian Premier League, The Hundred, Caribbean Premier League aser tawa tenzükba SA20 nunga asayaogo.

### BILEMDANGANG

"Ochi meshi-i rongsen jenti bendenaka kwi bener aotsü."